

La carta del apóstol San Pablo a los Gálatas

Pablo escribe a las iglesias de Galacia

1 ¹⁻²Asa Pábloat ba acu ayin carit uch cuihsuro. Ba Jesús chiwa Galacia cajc cut itquin acu cuihsuro. Asan Jesucristo chihotá ehcúquibro. Sir ima ajc cut Jesús chihotá ehcuquib yehnjacro. Asan uw ajc cuitari Jesús chihotá ehcuquib yéhntiro. Cuat Sir ajc cut, Jesucristo ajc cut eyta yehnjacro. Jesucristo chiníc cuar sicor Sir imát estají yehn áyjacro. Eyta cuat Sirat as caquir Jesús chihotá ehcún wajacro. Aját carit uch ba acu ayin as owár bin owár cuihsuro.

³Sirat Tetát cat Cara Jesucristoat cat ba sehnác etar aját ba cuitar conro. Ba obir yajcayta acu ba ohbac ítayta acu conro. ⁴Cara Jesucristoatan isat Sir tayar yajác tunin acu chinjacro. Is siwin acu eyta chinjacro. Sir uw bár binat ur ay bár icar ayir éytara isra eyta ayti acu chinjacro. Sir Tet ima ajc cut eyta chinjacro. ⁵Uwat Sir tamo Tet tamo ay séhw̃ataro. Sir ojcor Tet ojcor ay wacátaro. Bur cut suw cut eyta wacátaro.

No hay otro mensaje de salvación

⁶Aját ítitan, baatán Sir chihotá biráy rehti wácajacro. Eyta wácajac tew̃ ic rahcúr as ub yehw̃ jacro. Récajian Sirat baan ima uw jaquin acu cájacro. Síratan Jesucristo chihotá cut ba racar reht eyta cájacro. Eyta cuar baat Sir chihotá sicor chac bahcaro. Chac bah rabar chihotá istiy ajquir bi cácaro. ⁷Baat eyta waca técayat ay batro. Sir chihotá istiyrá batro. Istiy chihotá cuitar Sir tayar bitách túnajatro. Cuatán cahujinat ba cayar yajca racar rehquít, Jesucristo chihotá tehmar ba quin ehcuro. “Jesucristoat uchta récaji wajacro,” wacaro. “Uchta yajquir cuitar behmarat Sir tayar yajác bar túnataro,” wacaro. Ba quin eyta waquíc cuar, cuayir tew̃ro. ⁸Uch síhw̃awi. Récaji isat ba quin Sir chihotá queney ehcujacro. Ahra ísatara, cahujínatara, cuacúr Sir cacminátara ba quin chihotá istiy ehcúyeyra, Sirat ey cuécwayqueyra. Cab oca icar wahnáyqueyra. ⁹Aját ba quin cahmor wajaquey

bucoy im eyta waquinro. Bíyatan chihtá istiy ajquíř bi ba quin ehcwáyatan, eyan Sirat cuécwayqueyra. Cab oc icar wahnáyqueyra. Bíyatan chihtá isat ehcujaquey tehjár ehcwáyatan, eyan Sirat cab oc icar wahnáyqueyra.

¹⁰ Aját eyta wacáyatan, ¿baat síhw̄atan, uw ubot ay waan sehwar eyta waquíc síhw̄aqui? Eytara batro. Asan Sir úbotra ay waan sehwar eyta wajacro. Asan uw úbotra ay waan sehwar eyta waquíř waquíř asan Jesucristo chíwai chácajatro. Uw ubot ay waan séhw̄aquir waquíř, aját ba quin eyta téw̄ajar binro. Eyta cuar asra étai batro. Aját Sir ub cahmor behmár quin ehcúc uyan uniro.

Cómo llegó Pablo a ser apóstol

¹¹ Rábinu, aját uch ba quin ehcuro. Chihtá aját ehcuřác ey uw chihtai batro. ¹² Uw acsari ábtiro. Chihtá eyra as quin úwati síw̄tiro. Cuat Jesucristo imát as quin ehcuřacro.

¹³ Baatán bar rahjacro. Asan récaji judío chihtá cuitar ítchacro. Asan judíoín chihtá caquir cat eyta ítchacro. Eyta ita rabar aját Jesucristo chiwa quehsujacro. Jesucristo chiwa ruhw̄ujacro. Eynat Jesucristo chihtá wácayta acu ruhw̄ujacro. ¹⁴ Etar asan judíoín rehquíř cohtín cohná bahjaquey chihtán yajca rácaran cuít rehjecro. Eyta yajca racar rehquíř Moisés bachan chihtán cuít yajacro. Ajatán asi jor cunjáquinat yajacan cuít yajacro.

¹⁵⁻¹⁶ Eyta cuaquíř Sirat ima wacján rehtara as quino ehcuřacro. As anto yehnti ab ohcuá sar cuácayat echí Sirat as bar cájaquinro. Caquir cat semar as ima chiwa yehn áyjacro. As sehná rehquíř caquir car eyta yehn áyjacro. Sirat as sehná rehquíř ima wacján rehtara as quin ehcuřacro. Aját Sir ima wacját yajác chihtá acsar ehcwayta acu as quin ehcuřacro. Ba judío bár bin quino ehcwayta acu as quin Sir imát eyta ehcuřacro. As quin eyta ehcwayat, aját bar cájacro. Caquir Jesucristo imát tew̄jác acsar sinin acu aját récaji uw quinoi táyotiro. ¹⁷ Jesús chihtá ehcuquin Jerusalén cuitar itquin quin Jesús chihtá sinin acu tayoy bitiro. Jesús chihtá ehcuquinan as anto ehcuquib yehnti cuat echí Jesús chihtá ehcuquin yinjáquinro. Asan eyin quin biti cuar as Arabia cajc cut birách rehti bijacro. Uw bár cuitar Sir tamo sehwan acu bijacro. Eyta bir car ítchareht yácajareht sicor Damasco pueblo cuitar wijacro.

¹⁸ Etar bara bay cuat asan Jerusalén pueblo cutar cu bah cujacro. Pedro tihráy cu bah cujacro. As erar cur Pedro jor semán bucáy cuanjacro. ¹⁹ As erar cur car Jesús chihtá ehcuquin cahujinra istiti rehjecro. Pédrora bar ítchacro. Cara Jesús rab Jacob cat ítchacro. ²⁰ Aját uní tew̄a rabar cuihsuro. Aját Sir cac cahm sucuar tew̄tiro. Sucuar tew̄quir waquíř, Sirat as bar cuécwataro.

²¹ Etar yahncút asan Siria cajc cut Cilicia cajc cut bijacro. ²² Jerusalén pueblo cuitar Judea cajc cut birách ítitiro. Eyta cuácayat, Jesucristo chíwatra asan uchta ácamra tíhrtiro. Judea cajc cut chíwatra ub cuitar as ítítiro. ²³ Cuat cucáj cuitar as ojcor tew̄ic rahjacro. Aját yajác chihtá rahjacro. Cahujinat wajacro: “Pábloat récajira Jesús chiwa ruhw̄ujacro. Eyta ruhw̄ujác cuaquir ahra ey urá bar

tehmojacro,” wajacro. “Urá tehmár car ahra Jesucristoat yajác chihtá ehcwáy yehnjacro,” wajacro. Eyta téw̄queyan Jesucristo chiwa Judea cajc cut ítquinat bar rahjacro. ²⁴Eyta rahcuír car, as urá tehmójóc reht éyinat Sir quin ay tew̄ jacro.

Los otros apóstoles aceptan a Pablo

2 ¹Beya tíjcajareht yájcajareht asan bucoy Jerusalén cu bah kujacro. Bara catorce cuácayatan asa bucoy cu bah kujacro. Bernabé jor cu bah kujacro. Tito judío bár bin cat is owár béjacro. ²Sirat cámsiris cuitar as erar ayat, bucoy cu bah kujacro. As erar cur car, Jesús chiwa carin imár owara etan tew̄ jacro. Aját judío bár bin quin bi chihtá síw̄ ictara, éyinat cat istayta acu ehcujacro. Eyinat ístítieyra, aját cuayar siw̄ ic síhw̄ata óraro. Eyta síhw̄ayeyra cahujinat cat aját ehcuquey rahcti chácataro. Eyta etar aját cuayir ehcú cun bár etar eyin quin récaji ehcujacro. ³Eyin quin ehcwayat, bar rahjacro. Rahcuír car carin éyinat as jor Tito bijaquin quínora umá ehsún wátiro. Tito judío bár bin cuara, ey quino bachan chihtán yajquín wátiro. ⁴Isan Jesucristo chiwa Jerusalén pueblo itquin quin cucayat, cahujín cat raújacro. Jesús chiwa bár binat isat tew̄ ic rahuín acu, uron acu raújacro. Eyinat isat bach yájtítara ístín acu raújacro. Eyta ístír isat bucoy bach yajcayta acu tec ajc cut tew̄ jacro. ⁵Eyta yajc ayin tew̄yat isat eyin chíhtara rahcti jájacro. Cati jájacro. Sir chihtá tehmoti ácuán eyta rahcti jájacro. Baat Sir chihtá tehmoti bi cácyta acu eyin chíhtara cati jájacro.

⁶Chiwa cárinat aját uw quin acsar chihtá ístiyí ehcwayta acu icúr wátiro. As quin “bahat récaji ehcujaquey cábaro,” wajacro. “Ey cutar acsar chihtá ístiy ehcuti jaw̄ i,” wajacro, éyinat as quin. Eyinan Jesús chiwa carin cuar, as acu bitarach batro. Sir ub cahmar carin cat, carin bár bin cat imár owáraro. ⁷Eyinat ítitan, Sirat judío bár bin quino ima chihtá síw̄ayta acu as cájacro. Sirat Pedro judíoín quino ima chihtá síw̄ayta acu caquir eyta judío bár bin quino síw̄ayta acu asa eyta cájacro. Eyin ítitan, éytaro. ⁸Sirat Pedro quin judío síw̄ayta acu urá wíjacro. Sir im eyat as quino cat judío bár bin quin síw̄ayta acu urá wíjacro. Sirat is quin eyta wícyat éyinat itchacro. ⁹Eyinat Sirat as quin uw siw̄ in acu as urá wijac ístír as quino ohbac ténajacro. Santiágoat cat, Pédroat cat, Juanat cat chiwa cárinat as quínoan ay ténajacro. “Bahatrun judío bár bin quin Sir chihtá siw̄ i,” wajacro. “Cuatán ísatra judíoín síw̄ inro,” wajacro. ¹⁰“Bahatán récaji síw̄ jacan caba síw̄ jacro,” wajacro. “Cuaquir Jesús chiwa cuayin tamo cat seh̄w̄awi. Eyin tamo seh̄w̄ar car eyin obir yajw̄ i,” wajacro. Etana wajacro. Eyta wacayat aját ey chihtá ay cájacro. Cuayin obir yajc cun rehjacro.

Pablo reprende a Pedro en Antioquía

¹¹Itchareht yájcajareht as bucoy Antioquía pueblo cuitar chácayat, Pedro cat erar bijacro. Pedro erar bir ityat, aját cahujín ubot ajc uní cuitar técuajacro. Eyat yájcajar bin yajquíc etar ajc uní cuitar técuajacro. ¹²Pedro erar récaji cur car judío bár bin oca yájacro. Eyta yajac cuar Jacob chiwa sicar bin cahujín Antioquía pueblo behcayat Pédroat judío bár bin oca yaquic etchacro. Jacob chiwa cahujinat

bachan awí ques técuata sehwar judío bár bin owár ira yaquic etchacro. Judío bár binra umá ehsuti bin etar ey chihotá ques técuata sihwár eyin oca yaquic etchacro. Eyta yajcayat aját sihwát, Pedro urá bucáy waajacro. ¹³Pédroat eyta yajcayat Jesús chiwa judío bin cahujinat itchacro. Istír éyinat cat Pédroat yajquír eyta yajcáy yinjacro. Sicor urá bucáy sihwáy yinjacro. Bernabeat chi Pédroat yajquír eyta yajcáy yinjacro. Eyat catum judío bár bin oca yaquic bar etchacro.

¹⁴Eyta etar aját uchta wac técuajacro. Sir chihotá cuitar waquít, Moisés bachan chihótán eya yajcáyatron Sirat uwa siwa báreyra. Cuat Jesucristo chihotá ráhcyatan, bar síwayqueyra. Eyta cuar Pédroat bachan chihótán bucoy yajcáy yehnjacro. Judío bár bin oca yaquic etchacro. Eyta cuácayat aját bahnaquin ubot Pedro técuajacro. Tecuar wajacro: “Bahan judíoín cuar, Jesucristo chihotá caquin ácuán Moisés bachan chihótán yajquíc et bahjáquinro. Etír car judío bár bin itir eyta itay raíjaquinro. Eyta bira ¿bitara rehquít bachan chihótán bucoy yajqui? Bahatan Moisés bachan chihótán eyta yájceyra, ¿cahujinat cat im eyta yajcata bin síhwájaqui?” wajacro, aját Pedro quin.

Los judíos, igual que todos, son salvados por fe

¹⁵Isra judíoín sicar cohná bahjacro. Judíoín tan sihwát, judío bár bin bahnáquinan ur ay batro. Cuatán imarin étai bár síhwaro. ¹⁶Eyta cuar isat ítitan, uwat Moisés bachan chihótán yajquír cuitar Sir tayar tuna báreyra. Cuatán Jesucristo chihotá cácyatron, uwat tayar yajaquey sicor tayar bár jácayqueyra. Eyta cuácayat isat Jesucristo chihotá cájacro. Isat



(Gálatas 2.14)

tayar yajaquey tayar bár chácayta acu isat ey cájacro. Cuatán bachan chihtán yajquír cuitari Sir cac cahm tayar batra chaca báreyra. Bachan chihtán yajquír cuitar Sir tayar rehratí túnajatro.

¹⁷Isat Sir tayar yajaquey sicor tayar bár chácayta acu Jesucristo ojcor conro. Isat eyta conyat judíoinat ítitra, isat bachan chihtán yajcata bin yajti rehquít ur ay bár yajquíc síhw̄aro. Judíoín tan síhw̄at, Jesucrístoat is quin ur ay bár eyta yajc ayíc, síhw̄aro. Eyta síhw̄a cuara, eyta cat batro. Cuayir síhw̄aro. Jesucrístoatra uw quino ur ay bár yajcayta acu ajqui waa báreyra. ¹⁸Aját récaji bachan chihtán yajquíc et bahr car bucoy aját ey bachan chihtá yajcay yehníctara ay batro. Aját eyta yajcayt Sir tayar yajcaro. Chihtá teh moyat Sir tayar yajcaro. ¹⁹Récaji ajatán Sir tayar tunin sehwar Moisés bachan chihtán yajacro. Cuácayat bachan chihtán bahnác yajcata bin cuara, caba yájcajar rehjecro. Caba yájcajar etar, etí téjecro. As urá Sir icar chaquin acu bachan chihtán etí téjecro. ²⁰Jesucristo caruc ojcor quejcyat chinír eyta, as cat ey chihtá cut eyta chinjacan wanro. Asan bachan chihtán yajquín acura chinjacan wanro. Eyta chinjacan wan cuar as estají rehcaro. Jesucristo ajc cut Sir wacjáj ajc cut as estají rehcaro. Ey tamo sehwa rabar estají rehcaro. Sir wacjáj as sehnacro. As sehnác reht aját Sir tayar yajác tunin acu im urá cut chinjacro. ²¹Sirat as sehnác chihtá aját ajcá batra chátiro. Moisés bachan chihtán yajquír cuitar Sir tayar túnatair waquít Jesucristo cuayar chinjác rehcata óraro. Eyta cuaquir eyta cat batro. Eyta cuácayat eyta chinjác chihtá aját ajcá batra chátiro.

La ley o la fe

3 ¹Galáciainu, ¿baan bitara reht cuáyinir waayi? Uwat ba cayar yajacro. Aját récaraman ba quin Jesucristo caruc ojcor chinjác chihtá bahnác caba ehcujaquey. Eyta ehcwayat baat cájacro. Baat récaji eyta cajac cuar, ¿bitara reht tan chinyi? ²Aját ba quin uch táyonro. Sir Ajcan Cámuran Ey ba ur icar wícyat ¿ba tan síhw̄atan, bitara yajác etar wicyi? ¿Baatán síhw̄atan, bachan chihtán yajquíc étari wicyi? Aját ítitan, baat bachan chihtán yajác étari wítiro. Cuatán isat Jesucristo ojcor ehcujaquey uní síhw̄ajac etar wíjacro. Jesucrístoat ba síwata síhw̄ac etar wíjacro. ³Eyta bira bucoy cuáyitra sinti jaw̄ i. Bachan chihtán sicor yajcáy yinín síhw̄ati jaw̄ i. Récaji Sir Ajcan Cámuran Ey chihtá cuitar baan Sir chiwa yinjacro. Eyta yinyat acsar ey urá cuitar ítuwi. Behmár urá cut yajquír cuitar Sir chiwa bitách yínajatro. ⁴Sirat ba acu ay yajaquey, tan chinti jaw̄ i. Eyta tan chínyeyra, uw ajc cut sicor bachan chihtán yajcáy yínyeyra, ¿behmár bachan chihtán cuayar yájcajaqui? ¿Uwat ba ruhw̄ ú tacat baat cuáyitra tan úcajaqui? ⁵Sirat ba ur icar ima Ajcan Cámura Ey wícaro. Ba tac icar im urá cut bahnác yajcata ehcún acu ba ac bucoy bucoy bitara útara yajcaro. ¿Ba tan síhw̄atan, behmarat icúr yajác etar Im Ajcan Cámuran Ey wiqui? ¿Icúr yajác etar Sirat icúr bár sicar bahnác yajqui? ¿Bachan chihtán yajác etar wicyi? ¿Ba tan síhw̄atan éytaqui? Eytai batro. Baat bachan chihtán yajác étari wítiro. Isat Jesucristo ojcor ehcujaquey rahcuíc etar wícaro. Eyta etar Sirat im urá cut bahnác yajcata ehcuro.

⁶Récaji is cohtá Abrahámatan Sir imát yajquín wajaquey Síratan tehmoti eyta yajcata séhwājacro. Abrahamat eyta séhwājac etar, Sirat eyat tayar yajác eyan tayar bár chájacro. ⁷Eyta bira uch síhwāwi. Sir imat yajquín wajác tehmoti yajcata síhwāquinan Abraham urán wanro. Sirat eyin ítitan, Abrahámircuano. Abraham bómcarcuano. ⁸Sirat ima carit cutar récaji ehcuajacro. Judío bár binat cat ítchareht, cóhnajareht, Sir imát wajaquey éyinat rahcuata ehcuajacro. Rahcuata éyinan Sir imát tayar bár chácayqueyra. Sirat eyta ítchác rehquít, Abraham quin chihtá ay bi wajacro. “Aját bah bómcara cut cuar uw obir yajquinro. Cajc bahnác cuitar bah bomcara cut cuar uw bahnaquin cuitar waquinro,” wajacro, úchicrias Abraham quin. ⁹Eyta bira Sir imát yajquín wajác tehmoti yajcata síhwāquin cuitar Sirat bar wacátaro. Abraham cuitar waquír eyta Sirat wajác rahcuata eyin cuitar cat im eyta wacáyqueyra.

¹⁰Cahujinat tan síhwātra, bachan chihtán yajquír cuitar Sir tayar bár chácata síhwāro. Eyta síhwā cuar, bachan chihtán yajquír cuitari Sir tayar batra bitách chácajatro. Cuat Sir tayar yajcayat, Sirat cuéwayqueyra. Sir carit cutar wacaro: “Bíyinan bach carit cutar, chihtá carit cutar cuihsujaquey bahnác cábai yajti cuácayat, Sirat eyin cuéwayqueyra,” wacaro. Sir carit cuitar eyta wacaro. Eyta waquíc cuar, Sir bachan chihtán aútian istiyati bahnacra yájcajatro. ¹¹Eyta bira isat ítitan, bachan chihtán yajquír cuitari Sir ub cahmar tayar bár bitách waájatro. Cuat Sirat carit cuitar wacaro: “Sir imát síwata síhwāqueyin, Sirat tayar bár chácaro. Tayar bár chácayat im owár cuacúr bur cut suw cut ohbac ítayqueyra,” wacaro, Sirat. ¹²Eyta étarwan Sirat síwata síhwāqueyinan bachan chihtán yájqueyinan imár owárai batro. Ajquitro. Bachan chihtán cuitar uchta cuihsú bahjacro: “Bachan chihtán yájquinat bachan chihtán bahnác caba yajcayat, cuacrár Sir owár ítataro,” wacaro. ¹³Eyta cuar bachan chihtán bahnác caban rehratí yájcajatro. Bahnáquinat auro. Eyta cuácayat Sirat isan cab oc icar cuecun acu binro. Eyta cuecun acu bin cuácayat, Jesucrístoat is bar síujacro. Is siwin ácuán uwat tayar yajacan Jesús imát yajquír éytaan wan waajacro, Sir ub cahmar. Uwat Jesucristo yauwin acu caruc ojcor yehwír quejecro. Sir carit cutar eyta yajquíc ojcor wacaro: “Biyan caruc ojcor cuacúr yehwír chácayatan, Sir tayar yajác ques icar yehwír chácaro,” wacaro. ¹⁴Judío bár bin cuitar cat Sirat wacayta acu Jesucrístoat uwat ur ay bár yajác tayar túnjacro. Abraham cuitar waquír eyta judío bár bin cuitar cat eyta waquín acu túnjacro. Sir imát réccaram ima Ajcan Cámuran Eya uw quin wiquin wajacro. Is quin wiquin acu isan Sisráam ator bin síwayqueyra. Isatan Jesucrístoat is síwata síhwāyat, is síwayqueyra. Is quin ima Ajcan Cámuran Eya wícaayta acu is síwayqueyra.

La ley y la promesa

¹⁵Rábinu, aját ba siwín acu uwat yajquey ojcor tewínro. Uwat contrato yajcayat, rahra rahra bitara yajquín bintara récaji tewíro. Tewír eyta yajquín werjayín cac cahmar cat wacaro. Bitara yajquín werjayín cac cahmar wacayat, im eyta tehmoti yajcátaro. Acsar chihtá istiy bitách chácajatro. ¹⁶Ahra uch síhwāwi.

Sirat Abraham quin ey bomcar acu imát bitara yajquintar ey ojcor ehcujacro. “Aját bah bómcara cut cuar bahnaquin cuitar waquinro,” wajacro, Sirat Abraham quin. Eyta wacayat, “bah bomcarini” wátiro. Quir bin ójcori wátiro. Cuatán “bah bomcar eya” wajacro. Eyta wacayat, istanáć ojcor wajacro. Jesucristo ojcor wajacro. ¹⁷Aját uch ojcor tewro. Sirat Abraham acu yajquín waquíř cuitar bara cuatrocientos treinta cuácayat, Moisés quin bachan chihtán wíjacro. Eyta wijac cuar, imát cahmor wajaquey tehmoti yajcáyqueyra. Abraham bomcar cut cuar uw bahnaquin cuitar waquíř wajaquey tehmoti yajcáyqueyra. ¹⁸Sirat is cuitar wacayta acu uwat bachan chihtán yajcátair waquíř, Sirat Abraham quin wajaquey bar tehmojóć óraro. Eyta cuar eyta cat batro. Cuat imát Abraham quin ima bomcar cut cuar uw cuitar waquíř wajác reht Sirat eyta tehmoti yajcaro.

¹⁹Eyta cuácayatan, Sirat bachan chihtán bitán wac bahjáćtara, aját ba quin ehcunro. Abraham quin wac bah yahncút Moisés quino bachan chihtán wac bahjacro. Uw imarat bitara utar ur ay bár yajquey istayta acu wac bahjacro. Abraham bomcar yehníc oco tas bachan chihtán cutar imarat ur ay bár yajquíc istayta acu wic bahjacro. “Abraham bomcar” wacayat Jesucristo ojcor wacaro. Sir imát Jesucristo cut cuar uw bahnaquin cuitar waquíř wac bahjacro. Jesucristo yehníc oco tas Sirat ima bachan chihtán uwat yajquín acu Moisés quin wac bahjacro. Sirat ima cuacúr cacmín cut cuar Moisés quin bachan chihtán ehcujacro. Etar Moisesat acsar uw quin síw jacro. ²⁰Cuat Abraham quin Sir imát caba wajacro. Cahujín cut cuari wátiro. Sir imát Abraham quin wajác reht cahujinat bucoy ehcwátai batro.

El propósito de la ley

²¹Sirat Moisés quin bachan chihtán wíćayat, réćaji imát Abrahamin ac yajquín wajaquey tehmon acui wítiro. Sir imát wajác etar bitách téhmojotro. Cuatán bachan chihtán yajquíř cuitar Sir tayar túnatair waquíř, ey yajquíř cuitar uwat bar túnata binro. Bachan chihtán yajquíř cuitar Sir quin cuacúr cuwátair waquíř, eyta yajquíř cuitar tayar bár chácata binro. ²²Eyta cuara eyta cat batro. Eyta cuácayat Sirat carit cuitar wacaro. Uw bahnáquinat imár chihtá cuitar ur ay bár yajquíc étajatro. Cuatán bíyinatán Jesucrístoat síwata síhwáćtara, Sir imát yajquín wajaquey eyin acu tehmoti yajcáyqueyra. Eyta síhwáć etar eyin síwayqueyra.

²³Réćaji Jesucrístoat uw síujac chihtá anto ehcuti cuat isat bachan chihtán yajcata rehjecro. Eyta cuar bahnác cábai yáćtiro. Cábai yajti etar uwan táyaran cuájacro. Cárcel icar uw cuaquir eyta bachat chihtát uw eyta cuájacro. Jesucristo cut cuar is síwata ehcúc cab cuc oco tas eyta cuájacro. ²⁴Jesucristo anto yehnti cuat, Sirat bach ey chihnt ey cuitar íćayta acu réćaji waquíř chájacro. Isat yahncút Sir ima chihtá queney cáćayta acu cahmorán bachan chihtán eyta chájacro. Yahncút isat Jesucrístoat is síwata síhwáćyayta acu eyta chájacro. Isat Jesucrístoat is síwata síhwáćyay, Sirat isat ur ay bár yajác táyaran tayar bár chácaro. ²⁵Ahra Jesucrístoat is síwata bar ehcujacro. Eyta ehcujác etar ahra Sirat is quin bach ey chihtá ey cuitar itin wátiro.

²⁶Ahra ba bahnáquinan Jesucristoat ba bár síwata sihw̄ac rehquít, Sir sasá waajacro. Jesucristo jor ur istanác etar Sir sasá waajacro. ²⁷Ba biyin Jesucristo chiwa aw̄a rabar rih sar siw̄ jáctara, éyinan Sirat ítitan, Jesucristo itir eyta itro. ²⁸Eyta bira judíoín cat, judío bár bin cat Sir ub cahmar owáraro. Chiwa tacat, carin tacat owáraro. Serin tacat, chaunín tacat owáraro. Is bahnáquinat Jesucristo urá cut ur istanro. ²⁹Ba Jesucristo acu sasá waar Abraham bomcar rehcaro. Ba Abraham bomcar rehcatay, Sirat ba cuitar wacáyqueyra.

4 ¹Aját uch ba quin wacaro. Cahujín uwat oya cat, ray cat, caje cat, ica cat ima wacjá ac chac bahcaro. Tetatán anto yarti cuat uchta wac bahcaro: “As wacjá anto cúntieyra si ayti jaw̄ i. Cato ayti jaw̄ i,” wac bahcaro. Etar rayra wacjá imáy tacat anto cun tíhrtieyra ray icar bitách sícajatro. Bitách cátojotro. Cacminát patronay ray cátoyor eyta, wacját cat anto conu cuat ima ray tacat, tetát chac bahjaquey bitách cátojotro. Eyan cacmán wanro. ²Cuatán oyan, rayan, cajcan istiyát obir yajcaro. Wacjá anto bahnác cun tíhrti cuat istiyát obir yajcaro. ³Wacj ey anto cun tíhrti bin ur eyta is urá cat éytaan wan rehjecro. Sir chihtá anto istiti etar eyta rehjecro. Eyta rehquít bachan chihtán yajquír cutar ohbac itin síhw̄ajacro. Istiti rabar bachan chihtán yajquír cuitatra isan cab oc icar cuacay cahm síwata síhw̄ajacro. ⁴Etat Sir ima wacjá caje uch cutar ayic cab cucayat, bar áyjacro. Ayir cat wiw̄ á oje cut bin yehnjacro. Yehnár Sirat Moisés quin bachan chihtán wíjaquey cuitar ítchacro. ⁵Is biyin bachat chihtát cuáquictara, eyin acsar cuac ayti siwin acu wacjá eya bachan chihtán yajca rabar ítchacro. Isan Sirat ima sasá cácayta acu Sir wacjá eyta yehnár ítchacro.

⁶Baan Sir sasá etar, Sirat Ima Ajcan Cámuran Eya ba ur icar chájacro. Jesucristo ajc cut chájacro. Sir Ajcan Cámuran Eyat ba ur icar cuar is cuitar Sir quin wacaro: “Siru, Tetú,” wacaro. ⁷Eyta cuácayat baan Sir ima sasá waajacro. Ahra ba Sir acu cacmini batro. Ima sasaro. Ba eyta waacayat ahra baan Abraham bomcatró. Abraham bomcar etar, Sirat ba cuitar wacáyqueyra. Sirat ima sasá quin wícata ey ba quino eyta wícayqueyra.

Pablo se preocupa por los creyentes

⁸Récaji baatán Sir queney ajcá ji bétiro. Sir queney bár bin tamo síhw̄ajacro. Sir cat bár cuar baatán eyin ajcá ji béjecro. Eyin acu cacminán wan chájacro. ⁹Cuatán ahra Sir queney ajcá ji beyic sínjaquinro. Aját ba ojcor Sir ajcá ji bequic waquíc cuar Síratwan baan ajcá ji bécaro. Eyta etar ¿bitara reht bucoy bachan chihtán yajcáy yinqui? ¿Bitara reht cuáyara bi tamo síhw̄aqui? ¿Bucoy bachat chihtát behmár bucoy cuácajaqui? ¹⁰Baat judíoínat yajquír eyta yajcaro. Judíoín canár yajti ricar baat cat bach yajcáy yinjacro. Bi sihyór icar éyinat bach yajctar baat cat ey sihyór icar bach yajcaro. Bi sihyór icar éyinat fiesta chácayatan, baat cat ey sihyór icar fiesta chácáro. Runar icar cat, bara icar cat eyta yajcaro. Sirat ba síwayta acu eyta yajcaro. ¹¹Baat eyta sihw̄ar bachan chihtán yajquít cat, cuayir yajcaro. Aját récaram ba quin Sir chihtá ehucáj cuar, baat bar tan chinjác óraro. Eyta tan chinyat, ba sehnác rehquitan asan cuero.

¹²Rábinu, ba racar reht ba ojcor conro. As itir eyta ba cat eyta ítuwi. Asan bach ey chihnt ey cuitar ítiti eyta ba cat ey chihntá cuitar ítiti jaw̃i. Réccaram ba bachan chihntán cati itir eyta as cat eyta itay yehnjác etar ba cat acsar im eyta ítuwi. Baat as ruh̃w̃ útiro. ¹³Baat ítitan, asan yaran to chájacro. As yar rehjec etar ba cajc cut ítchacro. Ba cajc cut ita rabar aját ba quino Jesucristo ojcor ehcujacro. ¹⁴As yar icar chajac reht ba acu canarán abáy chájacro. Canarán abáy chajac cuara baat as yaryat as ria bár chátiro. “Pablo restán abayro,” wátiro. Baat as ay siti cuar, as ajcá ji béjecro. Sir cuacúr cacúm ajcá ji beyar eyta as cat eyta ajcá ji béjecro. Jesucristo ima ajcá ji beyar eyta as cat eyta ajcá ji béjecro. ¹⁵Baat réccaram as eyta ajcá ji béjecro. Ahra éytara batro. ¿Bitara reht éytaqui? Aját ba ojcor yarsa wacátaro. Réccaji baatán as icúr táyojoc tara, as quin bahnác wíjacro. Behmár ub cat as quin wiquin acu ucata rehjequir waquít as acu bar uquir wijac óraro. ¹⁶Eyta cuar ahra baat chihntá uní ey rahcuí cun bár rehcaro. Aját ba quin uní wajác etar ba tan sihw̃at ¿aját ba quehsuqui?

¹⁷Aját ba quin wacaro. Judío chihntán síw̃quinat ba íw̃oro. Ba cayar yajquín íw̃oro. Eyinat as ohnor ba siu beyin sihw̃ar íw̃oro. Baat imaran ajcá ji beyayta acu íw̃oro. ¹⁸Aját ítitan, cahujinat baan íw̃oyatan yársaro. Uní íw̃oyatan yársaro. Asan ba owár tacat, ba owár bár tacat im eyta uní yarsa íw̃otaro. Cuatán ba cayar yajquín sihw̃ar íw̃oyatan ay batro. ¹⁹Rábinu aját ba sehnanac cuitro. Ba urá Jesucristo icar chac aya rácarat isoro. Eyta isóc etar as cuac bécaro. Ab ohcuá sar waquích isó racayat cuaquir eyta, as cat ba urán Jesucristo icar chac aya rácarat asa éytaan wan cuac bécaro. Eyta chac oco asan eyta cuácayqueyra. ²⁰Aját ba bitara síw̃atatar bitách téw̃ajar rehcaro. Aját ba tamo séhw̃aro. Eyta sehwar ba quin bi cun rehcaro. Asan ba quin in bi cun cuara, bitách béjetro. Asan erar ba owár rehquir waquít ba owár ohbac téw̃átaro.

El ejemplo de Agar y Sara

²¹Ba cahujinat Sirat ba síwayta acu Sir bachan chihntán yajquín síhw̃aro. Baat Sir chihntá ay sinti etar bachan chihntán yajquín síhw̃aro. Bíyinat eyta yajquín síhw̃actara aját eyin quin uchta wacaro. Uch síhw̃awi. Bach carit, chihntá carit cutar uchta cuihsú bahjacro: ²²Abrahámayan serin sasán bucáy cohnajacro. Istiyrá cacúm ohc cut, Agar ohc cut cohnajáquinro. Cacúm ohc cut cohnajaquey ajcan Ishmaelro. Istiyrá ima wiya queney ohc cut cohnajáquinro. Ima wiya queney ohc cut cohnajaquey ajcan Isaacro. ²³Cacúm wajc eyra Ishmaelro. Uw bahnaquin yehnár eyta Ishmael eyta yehnjacro. Cuat ima wiya queney ohc cut Sara ohc cut yehnjáqueyra Isaacra Sir ima ajc cut yehnín wajác etar yehnjacro. Sir ima urá cut yehnjacro. ²⁴Sirat is acu bitara yajquíc tara is quin siw̃ in acu eyta yehn áyjacro. Wiw̃ in bucáy wacayat, wiw̃ in etan ey ójcori wátiro. Sirat chihntá bucáy chajac ojcor cat wacaro. Wiw̃ á Agar wacayat cubar Sinaí cut chihntá wíjaquey ojcor cat wacaro. Sinaí cubar cut bachan chihntán wíjacro. Bíyinat bach ey chihntá ey cuitar Sir ub cahmor ay waan síhw̃actara, éyinan cacminán wanro. Bachat chihntát cuaquic etar cacminán wanro. ²⁵Agar wacayat Arabia cajc cut cubar Sinaí ojcor cat

wacaro. Ah cutar Jerusalén pueblo cutar itquin ojcor cat wacaro. Jerusalén cutar itquin bachat chihát cuaquic etar cacumán wanro. ²⁶ Cuatán cuacúr cut Jerusalén pueblo ajquiro. Bíyinan erar itay béyata bántara éyinat bachan chihátan yajcata bini batro. Isan éyino. ²⁷ Sir carit cuitar chihát uchta cuihsú bahjacro.

Sasá bár binu, waquích cohnti binu, cue rehti jawĩ i. Conti jawĩ i.

Sasát cuati binu, ahní rehwi. Ahra bahra sasá batro. Bomcar batro. Bah ra bár binat ítchareht sasán cuít cohnáyqueyra. Ra chi binat sasá etach cóhnajatro. Bahayra ricán cuít cohnátaro. Eyta bira bahra ahní rehwi. Sir carit cutar eyta wacaro.

Eyta wacayat Sara chauwíc bur bur cuar waquj cohnajác ojcor wacaro.

²⁸ Rábinu, aha cat isan Isaac éytaro. Sirat Abraham quin im wiya ohc cut waquj cohnín waquí eyta, is cat eyta ima sasá waan acu récaji bar wájáquinro. Sir imát wajaquey cuitar Isaac yehnár eyta, is cat Sir imát wajaquey cuitar Sir sasá waajacro. ²⁹ Ismaelan uw bahnaquin yehnár eyta yehnjáqueyatan Sir urá cut yehnjaquey ruhwujacro. Agar wacjác Sara wacjác ruhwujacro. Ah cat éytaro. Bachan chihátan yajquí cut Sir ub cahmor ay waata síhwáquinat Sir ima Ajcan Cámuran Eya chihát cut Sir sasá waajáqueyin ruhwuro. ³⁰ Eyta cuácayat Sirat carit cuitar wacaro: “Cacúm Agar cat, ey waquj Ishmael cat ay bo tewi. As waquj acu icúr bi cha bahquey wiya quen bi ohc cut cohnajaquey acu chac bahnro. Cacúm waquj acura báhtiro,” Sir carit cutar eyta wacaro. ³¹ Eyta bira, rábinu, isan cacúm waquích Ishmael éytara batro. Isan Abraham ima queneq wiya ohc cut cohnajác éytaro. Isan Abraham ima bomcatró.

Sigan firmes en la libertad

5 ¹ Bachat chihát is cuati acu Jesucrístoat is síujacro. Isat bach ey chihát ey yajcata bini bár rehcayta acu síujacro. Eyta bira Jesucrístoat ba síwata síhwāy ocuajaquey wácati acsar síhwāwi. Sir ub cahmor ay waan síhwār bucoy bachan chihátan yajquín síhwāti jawĩ i. Cuat eyta yajquín síhwāyeyra, bachat chihát cuácayqueyra. Cacminán wan rehcaýqueyra.

² As Pábloat ba quino wacaro. Bachan chihátan cuitar behmár umá cuic ayti jawĩ i. Behmár Sir ub cahmar tayar bár waan acu eyta cuic áyeyra, cuayir yajcaro. Eyta cuic áyeyra, Jesucrístoat Sir ub cahmor ba tayar bár chaquin acu yajáqueyra icúr acui batro. ³ Bucoy aját ba bahnaquin quin wacaro. Bíyinan ima umá cuic áyictara, éyinatán bachan chihátan bahnác caba yajcata binro. Conu auti bahnác caba yajcata binro. ⁴ Ba cahujinat Sirat behmár tayar bár chaquin acu bachan chihátan yajcáy yinjacro. Eyta yajcáy yinjác etar Jesucristo chihát waca téjecro. Eyta cuácayat Jesucrístoat ba siwa báreyra. ⁵ Eyta cuar ísatra Jesucrístoat is tayar bár chajac síhwāc rehquít, Sir ub cahmar ay waaquí acor séoti itro. Sir Ajcan Cámuran Eyat is quin urá wícaro, eyta waaquí acor ítayta acu. ⁶ Jesucrístoat ítitan, is umá cuiquíc tacat, is umá cuiti tacat bitarach batro. Cuatán isat Jesucrístoat íjmár síwata síhwāyatan, isat tayar yajác tayar bár chácayqueyra. Eyta sehwa rabar uw cahujín cat sehnác rehcaýqueyra.

⁷Récaji baatán Jesucristoat ba síwata sihw̃ay yinjacro. Eyta cuar istiyát baat eyta síhw̃ati acu tan téjacro. Eyta tan técayát, ¿baatán bitara reht eyin ria cacyi? ⁸Sirat ba cájaqueyat eyta yajcayta acu tew̃a báreyra. ⁹Eyta tan tequey chihtá úchtaan wanro. Uwat eb tajcro. Tajquí sar buc rehquey conu chácáro. Chaquir rihnoró. Rihnoyat eb bahnác buc rehcaro. Tan tec éyinatan eyta cuisa bucáy bay bin tan ter cuítar uw bahnaquin ruhw̃uro. ¹⁰Uwat ba tan tejec cuar, aját ítitan, Sirat ba quin ima chihtá cac áyataro. Aját waquey wácati cac áyataro. Chihtá istiyár cac aya báreyra. Ba tan téjequeyinan Sirat cuécwayqueyra. Carin tacat, chiwa tacat, cuaya tacat im eyta Sirat cuécwayqueyra.

¹¹Uch rahcwi. Aját uw quino Sir tayar tunin acu umá cuic ayquir waquí, uwat asan rúhw̃ajar oraro. Eyta cuar, aját uw quin eyta yajquín wati etar uwat as ruhw̃uro. Aját eyta yajquín wati cuar, Jesucristoat ba tayar bár chácayta acu caruc ojcor chinjác chihtá siw̃ro. Eyta siw̃ ic etar as ruhw̃uro. ¹²Ba tan téqueyinan ba owár ítiti cui beyata binro. Eyin ajquí cui beyata binro. Eyin eyta cui bécayát, asan ahní rehcatáro.

¹³Rábinu, baan bachan chihtán yajcata bini bár rehcayta acu Jesucristoat sújacro. Eyta sújac etar ba cacmín wani batro. Bachat chihtát ba cuátiro. Baan bachan chihtán yajcata bini bár cuácayát, baat ur ay bár icar rehti jaw̃ i. Cuatán rahra rahra sehnác chaw̃ i. Rahra rahra obir yajw̃ i. ¹⁴Bachan chihtán to cuihsú bahjacro. Cuat chihtá bahnacan caba yajquín acu chihtá istaná yajcatáro. Uchan eyro: “Uw sehnác chaw̃ i. Behmá urá cut behmán sehnác eyta cahujín cat eyta sehnác chaw̃ i.” Ey chihtá yajcatáro. Eyta yajcayát bachan chihtán bahnác caba yajcaro. ¹⁵Eytair báreyra, ba rahra rahra acsar técuayat, ¿ba ajquí wahw̃ujaca? ¿Ba bayar tecuas chaquir eyta chácajaquí? Técuati ituwi. Eytair báreyra tecuas icar chácayeyra, ¿behmár rahra rahra urá rúhw̃ajajú?

Los deseos humanos y la vida por el Espíritu

¹⁶Cuat aját ba quin uch waquinro. Ba urán Sir Ajcan Cámuran Ey icar chaw̃ i. Eyta chácayát bitara útura ur ay bár yajca racar tacat, eyta yajti bachwáyqueyra. ¹⁷Ur ay bár icar chájaquinatra Sir Ajcan Cámuran Ey chihtá quehsuro. Rahra cat Sir Ajcan Cámuran Ey chihtá cuitar ítquinatra ur ay bár yajca báreyra. Sir Ajcan Cámuran Ey chihtá cat ajquitro. Ur ay bár icar chaquin chihtá cat ajquitro. Eyta bira chihtá bucáy cuitari bitách ítajatro. Baan Sir Ajcan Cámuran Ey chihtá cuitar ítictara, behmár urá cut ítajatro. Behmár urá cut ítiti cuácayát ur ay ítayqueyra. Eyta chihntara ba urá Sir Ajcan Cámuran Ey icar chaw̃ i. ¹⁸Sir Ajcan Cámuran Ey chihtá cuitar ítictara, bachan chihtán cuitar ita báreyra.

¹⁹Ur ay bár icar chájaquinat bitara yájectara bahnáquinat itro. Eyinat uchta yajcaro: cahujín wiya cat bes yajcaro. Yehw̃ti bin jor cat camro. Síhw̃ati isár cat yajc sácáro. ²⁰Siri bár bin tamo cat síhw̃aro. Cuicá cat yajcaro. Reo cat cuhcaro. Uw cat quehsuro. Uw owár cat ténati itro. Cahujinay ey racar isó rabar cat tutro. Tecua cat cuít técuaro. Imaran cara yina racar cat isoro. Cahujín ohnor chiwa cat wahw̃ ú sicaro. ²¹Cahujinay ey imaray bár etar cat quehsuro. Bacua cut tutro.

Simat béccayat, síhw̄ati ur ay bár cat yajcaro. Aját ba quin uchta ey ojcor uní wacaro. Réccaji aját yarís wac bahjacro. Ah cat bucoy im eyta wacaro. Bíyinan eyta yajcáyatan, Sirat eyin siwa báreyra. Eyinan Sir cara rehquey cutar ita báreyra.

²²Cuatán Sir Ajcan Cámuran Eyat uw quin éytara yajc áytiro. Cuat uch yajc ayro. Sir Ajcan Cámuran Eya uw urá icar chájaquinan uw sehnác cat itro. Tan wan cat itro. Sihw̄a sácata ohbac cat itro. Cahujín owár in turti cat itro. Cahujín owár ur ay cat itro. Cahujín acu ur ay cat yajcaro. Cahujín cayar yajti cat itro. ²³Tecuas cat yajti itro. Imár urá cut ur ay bár yajca racar tacat yajti cat itro. Sir Ajcan Cámuran Eya ur icar chajac etar eyta itro. Eyta ítyatan rehratí: “Eytara yajti jawĩi,” waca báreyra. ²⁴Bíyinan Jesucristo chihtá cáccayatan, éyinat imár chihtá cutar ay bár yajca racar isoquey etí te bahcaro. Ay bár yájquican acsar yajti et bahcaro. ²⁵Sirat is ur icar ima Ajcan Cámuran Eya wíjacro. Eyta wíjac etar Sir Ajcan Cámuran Ey chihtá cuitar ítuwi. ²⁶Isan íjmár tamo cahujín cuitar síhw̄ati ítataro. Rahra, rahra tec chiti ítataro. Cahujinay ey rácara isoti ítata binro.

Ayúdense unos a otros

6 ¹Rábinu, aját ba quin wacaro. Ba sicar bin istiyát ur ay bár icar chácata óraro. Eyta chácayat baat ey quin acsar ay bár yajti acu tew̄ata binro. Baan Sir Ajcan Cámuran Ey chihtá yájquinat ey quin ur ay chácayta acu eyta tew̄ata binro. Eyta tew̄a rabar téccuati cuar ajc uní cuitar wacata binro. Eyta waca rabar yají jawĩi. ¿Sisramat ba cat cayar yájcaqui? ¿Sisramat ba quin Sir ub cahmar ur ay bár yajc áyajaqui? ²Sisramat ba ay bár yajc ayti acu behmár cuitar rahra rahra wawĩi. Eyta waquí cuitar Jesucristo chihtá caba yajcáyqueyra. Jesucristoat rahra rahra eyta cuitar waquí acu waquí chájacro. ³Ba cahujinat behmár tamo, “asan urán cuitro,” síhw̄aro. Behmár ur icar eyta síhw̄ajar bin síhw̄aro. Eyta síhw̄aquinra sicor cat imár cayar yajcaro. ⁴Eyta cuácayat ba bahnáquinat behmarat bitara yajquítara, bitara ítictara ey síhw̄awi. Behmár tamo eyta síhw̄ar, ay yajquítara, ay ítictara, behmár ahní rehcatáro. Cuatán ba ur ayan cahujín cuít rehquítara, cahujín ayan etach cútitara, ey ojcor síhw̄a sácata jawĩi. ⁵Is bahnaquin istiyát istiyát ur ay itin ac ay síhw̄ar yajcátaro.

⁶Sir chihtá sinay yinjáqueyinat imár siw̄quin quin imár oya sicar cat, ira sicar cat wícataro. Eta jaw̄ obir yajcátaro.

⁷Yají jawĩi. Behmár cayar yajc ayti jawĩi. Cuáyitra sinti jawĩi. Uwat Sira búrbatra yájcajatro. Sitra behmár tahnác bira, Sir tec chiti jawĩi. Uwat bitara yajquítara Sirat sicor cat im eyta túnayqueyra. Ay yájáqueyin acu ay túnayqueyra. Ay bár yájáqueyinra cuécwayqueyra. ⁸Bíyinat imár urá cuitar ay bár yajquítara imarat ur ay bár yajquíc tehmar Sirat cuécwayqueyra. Cuatán, bíyinan Sir Ajcan Cámuran Eyat yajc ayquey yajquítara éyinan Sir Ajcan Cámuran Eyat bur cut suw cut Sir owár itay béyayqueyra. ⁹Eyta bira ay yajquíc eyra etiti acsar séoti yajwĩi. Eyta yajcayat Síratán ba acu ay yajcáyqueyra. Cab cucáyatan, Sirat cuacúr béyayqueyra. Im owár itay beyáyqueyra. ¹⁰Ahajira uw

owár ita rabar ay yajcata cab anto waati eyra ay yajw̃ i. Baatán uw bahnaquin acu ay yajw̃ i. Uwat Sir chihtá cájaquin eyin acuwat ayan cuít yajw̃ i.

Advertencias y saludos finales

¹¹ Carit uch cuitar acsar ajmár at cut cuihsuro. Ajmár at cut cáritan itan cumac bi cuihsuro. Baatán eyta itro. ¹² Judío chihtá síw̃quinan judío cahujín owár ay yehn cun rehcaro. Etar ba quin umá cuic ayro. Judío cahujinat eyin ruhw̃ ú cahmar ayú reht éyinat ba quin umá cuic ayro. Jesucristo caruc icar uwat ay bár yajác tayar tunin acu chinjác étani siw̃yat, uwat eyin ruhw̃uro. Eyta ruhw̃ ú cahm ayú reht ba quin umá cuic ayro. ¹³ Cuat bachan chihtán cuitar ba quin umá cuic ayic cuar, imáratra bachan chihtán cábai yájtiro. Cábai yajti cuar ba quínora bachan chihtán cuitar cuar umá cuic ayro. Baat eyin ajc cut umá cuicáyatan cahujinat eyin tamoan ay séhw̃ata etar eyta cuic ayro. ¹⁴ Cuatán ajatrá ba quin umá cuic áytiro. Cahujinat as tamo ay séhw̃ata tacat cuic áytiro. Sirat ajc waátiro. As ay waan acura aját icúr bachi yájcajatro. Aját ay waan acura Jesucristo uw tayar bár chácayta acu caruc icar chinjác chihtá ehcw̃ataro. Ey etiti síw̃ataro. Jesucristo as tayar bár chaquin acu chinjác sihw̃ac rehquít, aját uw chihtá eyra yajti wácajacro. Uw chihtá eyra ahra as acura icúr acuí batro. ¹⁵ Jesucrístoat ítitan, umá cuiquíc tacat umá cuíti tacat bitarach batro. Eyta yajquír cuitatran Sir tayar bitách túnajatro. Cuaquir uw ur Sir imát tehmóyatan sicor Sir tayar bár chácayqueyra.

¹⁶ Bíyinan Jesucrístoat tayar bár chácayatan éyinan Abraham bomcatró. Eyin ohbac ítayta acu aját Sir ojcor conro. Eyin ehúr bár chácayta acu conro. ¹⁷ Aját Jesucristo chihtá ehcúc ojcor uwat as ruhw̃ujacro. Uwat as ojc ruhw̃ujác chichán chero. Eyta cuácayat ah yahncutra acsar bachan chihtán ey ques técuati jaw̃ i. ¹⁸ Rábinu, aját ba cuitar Sir ojcor conro. Cara Jesucrístoat ba racar rehquít obir yajcayta acu conro. Ba urán ay chácayta acu conro.